

海天吟草

卷一澎湖

午後至奎壁山觀分海奇景不得

爭看摩西分紅海，奎壁山前若有待，潮退成路連赤嶼，絕世奇景歎主宰。
碧海波平天漸陰，風捲黑雲浪濤改，砂礫紛飛兼雷雨，乏傘遮身落拓倍。
示警還將紅旗豎，有司鳴笛不敢怠，唯恐旅人淪波臣，終留遺憾恨長在。
瓌景難逢憐緣慳，重來不知又幾載，行樂及時方無悔，嗟不先把水伯賄。
憶昔香祖飄天南，異域風土亦可采，意欲酣歌招舟子，踏月誰共聽欸乃。

註:此地原稱龜鼈山，奎壁聯輝傳由開澎進士蔡廷蘭(字香祖)依諧音所取，乃八景之一。蔡回鄉時乘船遭颱風飄至越南，返福建後撰成《海南雜著》。

登望安天台山並訪花宅

欣登望安最高峰，晴波漾翠煙千重。天台攬勝極浩渺，仙履留痕難從容。
迎眸諸嶼串珠列，離離青草都葱蘢。參差礫縫虎菊生，彤花落落非凡庸。
似迎游屐綠葉揮，不畏熱炙秋霜封。又往空村花宅詣，路少人聲顯幽靜。
殘壁瀕危重鞏固，尋訪尤堪坐日永。屋舍儼然稱大觀，何期人間有此境。
祖業於今三百載，槐安枕下覺夢冷。少壯多遷餘耄耋，但有貓兒虎威逞。
敢問誰識蓮花嶺，我亦慨嘆更畫餅。悵似飛鴻留殘爪，花月都成鑑中影。

註:虎菊為天人菊，天台山仙跡岩傳為呂洞賓內急時出恭所留下之腳印，蓮花嶺為中社村(花宅)先民勘查後，發現四周地勢像花瓣層層環繞。

吉貝島記遊

乘風海上遊，放眼景全收。喜是蓬萊島，能消世俗憂。
漁鄉多石滬，客次賞銀鈎。可得垂綸下，灘岩伴白鷗。

註:吉貝石滬數逾百，密集度世界第一。余嘗夜宿斯島二次。

西臺古堡懷古

驅車跨海橋，逕詣西砲臺。墉堞若磐石，驍勇無可摧。
前扼馬公灣，西掣夷軍來。奕代寇氛熾，萬頃滄波回。
人去賸營壘，客笑傾酒杯。真感海成桑，砲鏽蒙塵埃。
中堂字依稀，督辦稱雄才。其奈運途蹇，絕命詩亦哀。

註:西嶼西臺為李鴻章所題，其去世前曾寫下絕命詩。

憶畢業旅行夜觀花火節

競看穹幕燦銀花，亭畔迴傳笑語譁。
人湧如潮城不夜，光多映海月籠紗。
三生久已因緣定，十載深思契闊賒。
暢飲生啤銷一夏，何時還約共流霞。

數訪七美有感

快艇乘風破浪來，誰知漁棹舊多災。
望夫厓畔終成石，守節人間詎可哀。
奇景爭觀臨斷岸，淥波猶自蝕平臺。
安能世世心相印，卻見年年旅屐回。

重詣觀音亭

西瀛夕照最清酣，廿載重來雲景耽。
浪裏潛游頭亂竄，亭中稽覽史應參。
海邦爭霸今猶古，將士歸降忝亦慚。
欲衛和平誠不易，孤貞留與後人談。

註:退伍後曾邀好友於亭前游泳，該亭毀於 1884 年清法戰爭時，廟內文物、

神像等亦被掠奪。而近期彼岸軍機頻擾臺，令人擔憂。

二崁聚落保存區漫步

漫穿堂構歎瑰奇，島上猶聞唱竹枝。
好是傳香煙裊裊，何妨行客步遲遲。
褒歌多寫尋常事，閩巷遙懷少壯時。
莫使鄉愁鳶線斷，青山埋骨是男兒。

註:二崁部落磚牆大都使用風化之硧砧石，乃國內第一個傳統聚落保存區。傳香為天人菊、山芙蓉、艾草所製。陳家古厝為三級古蹟。

過通樑古榕

瀛海波平暑氣濃，乘涼何處買薰風。
猖狂日腳無情甚，幸有清陰橫碧空。

大菓葉柱狀玄武岩奇觀

擎天砥柱嘆神工，雕琢尤須萬里風。
料是媧皇來採石，移沙填港撼龍宮。

註: 日治時期於大菓葉海邊闢建碼頭，意外發現埋於土中之柱狀玄武岩。

卷二金門

參觀金門酒廠詳稽往史有作

浯島玉液寰宇曉，寶月泉甘不可少。籌建精研經七秩，九龍江廠亦堪表。
大將號令無不從，甲士用命冀克紹。佳釀終成資榆粉，柳營豪傑自矯矯。
巨瓶高矗廠門前，品評香醪人爭先。元戎接篆造金酒，蒐羅久儲能增錢。
醴齊曩昔本島來，襄助軍心南雲邊，兵員十萬駐海上，騎鯨人去星猶懸。
放翁雖老氣豪壯，畫角聲起橫龍泉。應知禦敵恃有待，自古生存非天全。
註:早期酒類由台灣輸入，胡璉將軍下令建酒廠，現今島上居民福利及建設多
仰賴金酒盈餘挹注。

太武山風景區歷覽諸勝景

無愧亭中歌正氣，太武山下更仰止，十二奇景今登臨，不絕兵燹紀青史。
散策徐徐官道趨，幽禽啾啾遍遐邇，似弔英靈曾浴血，勇護臺澎不畏死。
鐵礮隆隆驚寰宇，將士用命勢披靡。許是延平觀兵處，奕棋石室亦堪比，
幽壁雲蒸空塔影，勝朝早亡改姓氏。卅九魂歸離恨天，星月仍自照寒水。
細看勒石毋忘莒，彈下如雨竟不毀，自助人助誠不假，莫可輕忽彈丸子。
又參大士謁梵寺，法雨普霑千載垂，傳因仙翁返昊天，浯洲逕委觀音持。
滌洄潮聲似沉吟，華章早鐫賡詩遲，欲安塵心撫奇石，無明皆因貪嗔癡。
暮天雲翳倦鳥歸，山寺林表薰風披，人生半百日半落，何當奮起桑榆追。
註:胡璉將軍建無愧亭紀念陣亡兵士，亭內刻有正氣歌。而海印寺肇建於宋
朝，寺前嵌滿歌詠金門之詩作，寺內有安心石奇觀。

浯島城隍廟

晨興參玉宇，夜飲少青蓮。踽踽亭衢步，悠悠歲月遷。
齋心人靜肅，祀事島流傳。欲拯生民苦，仍須宰輔賢。

註: 浯島迎城隍已三百餘年，2013 年指定為國家無形文化資產。

烈嶼記遊

前扼九龍江，安危大膽扛。風雞非有偶，劍井亦無雙。
乍起瀟瀟雨，猶來點點艘。古今征戰事，血淚許同腔。

註：大膽及二膽島距離中國最近之島嶼僅 0.5 公里，自古為兵家必爭之地。

風雞為烈嶼特有之厭勝物，能鎮風煞保平安，劍井(國姓井)則為小金門最久遠之古蹟。

翟山坑道書懷

暑炙臨洞天，覽勝步棧道。海上清風來，灘頭素月好。
開鑿憐艱辛，功成似鐵堡。五載如螻蟻，征人亦苦惱。
運補乘小艇，狂瀾幾壓倒。驚歎神鬼造，耽閒事幽討。
亂世邦畿危，憂時杜陵老。今猶思良將，丹心護活島。

註：坑道歷時五年，動員 36 萬人次兵力始成。

參訪山后民俗文化村

驅車金沙鎮，逕來訪古厝。寶地稱鍾靈，前獅後虎顧。
開間臻十八，族親共宿寓。星霜逾百廿，隘門亦勇固。
人皆懷喬梓，錢財葉上露。傾囊資革命，中華賴擁護。
海珠堂前駐，高風益仰慕。渺渺塵事遠，悠悠故園步。
獨登觀海亭，遙聽浪吞吐。偉業應不空，汗青復當注。

註：金門人傳頌「有山后富，無山后厝」。王國珍父子為砥礪族人勤勉向學，村內建有「海珠堂」。

登莒光樓懷胡璉將軍

高矗金城對廈門，登樓睇盼海潮奔。
軍功堪表勳章賜，吏治澄明英魄尊。
奮勇揮師毋忘莒，耘梁藏富更推恩。
窮邊醉夢人何處，壘堞勾留覓月痕。

註:金門司令官胡璉將軍設立酒廠，人稱恩主公，鼓勵民眾耕植高粱換大米。

詣雙鯉濕地自然中心

可從屏幕識蟲魚，溽暑人來倦眼舒。
映水千荷香遠送，築堤雙鯉港成虛。
軍民早徙飛鳧駐，兵戰今教牧馬馱。
海上仙山應不再，湖干垂柳自悠除。

註:此地原為港口，湖為國軍防敵進攻，築堤阻斷海水而成，高空俯瞰狀似雙鯉魚。中心設有生態介紹之照(影)片，冷氣暫銷暑氣。

過金門鎮總兵署

署衙移建肇兵氛，舊堞都因戰火焚。
院邸深深誰嘯月，風流第一許君文。

註:此地傳為明萬曆進士許獬讀書處(卒年 37)，文章為海內所傳誦。署中有「嘯月軒」，後院之參天木棉已存活數百年。

浯江書院即景

視學浯洲弘聖道，緬懷朱子仰平生。
海濱鄒魯弦歌盛，蕊榜猶懸博士名。

註:書院內掛滿獲得博士學位之金門人姓名。

卷三馬祖

初訪芹壁聚落歎其風土特異詩以記之

凝眸殘壁憶滄桑，拾級山村雲日長。一從赤禍禹甸變，真憐將士邊愁藏。
盈牆標語引莞爾，神州遙望成他鄉。瑤宮暫歇撫碑碣，鐵甲神威傳梓桑。
徒嗟鏡澳棹歌杳，賸遺滿室咖啡香。雨流門牆鯉吐水，有島如龜靈氣揚。
早將頹瓦圯屋修，今來石室翻新妝。夜垂海干湧客鞋，藻蟲攢集浮藍光。
嗟歎麗景竟遺此，河漢蒼茫遙相視。孤島不孤人徜徉，珠璣還拾歸奚囊。

註:青蛙為該村之守護神，居民尊稱為鐵甲元帥。「藍眼淚」乃俗稱「夜光蟲」之渦鞭毛藻。村前之海龜狀礁石傳為風水寶地。

漫步北海坑道

深夏山中別有天，渠通碧海敵難前。
苟非神斧誰能鑿，喜逐丁香我亦憐。
舳舻輕搖驚詭譎，榮勳卓著不唐捐。
撫心應憫征夫淚，埋骨長教魂夢牽。

註:此為 1968 年因應戰略需要開鑿之「地下碼頭」，渦鞭毛藻聚集處常引來丁香魚，坑道內可乘舟觀看藍眼淚。

晨登福山

兀立青岑眺海湄，登臨照壁故人思。
江山錦繡都遭劫，風雨飄搖寧莫悲。
瀕險應聞軍鼓壯，坦懷想見藻文奇。
當年橫槊豪情在，報國今朝亦未遲。

註:福山頂有一枕戈待旦照壁，遙對大陸，下為馬祖最大之福澳港。

登祈福步道入馬祖宗教文化園區，遠眺彼岸煙波浩渺有懷

高矗門前山，持燈照寰宇，昔上聖母峰，天階灑法雨。
石雕仰崔巍，萬民盡安撫，祈福穿坑道，攢轎似行伍。
絡繹人不絕，虔心倚恃怙，馬港恩波潤，龍獅殿前舞。
倡建逾十載，功成不辭苦，祀典稱崇隆，飛昇入仙府。
今瞻衣冠塚，孝親感千古。心香燃一瓣，煙雲恣吞吐。
殷祈臺海靖，蓬萊作樂土，賽局毋輕忽。運籌賴戎輔。

註:馬祖登山家李小石曾攜媽祖金身登上喜馬拉雅山。每年農曆九月初九媽祖成道日均舉辦昇天祭。

鐵堡憶舊

荷戈港澳更誰同，剽悍堅心莫可攻。
懸命直須肝膽照，不教強虜渡瀛東。

註:此為人工開鑿之碉堡，曾有蛙人部隊鎮守港澳(口)。

雲台山攬勝

竦峙南竿第一峰，煙墩遠眺碧千重。
萑符靖盡收諸嶼，燭照邊情竹在胸。

註:雲台山標高 248 公尺，原名煙台山，乃南竿第一高峰，馬防部 1996 年於此興建軍情館，藉以強化官兵敵情教育。

過訪大漢據點

閩江口外鎮雄兵，板蕩雲天勢若擎。
碧海狂濤仍拍岸，似聞鐵砲耳邊生。

註:大漢據點乃戰略要地，位於南竿南方之鐵板海岸，控制莒光方向水道。

坂里大宅記事

人丁鑲砌石，鼙鼓月三更。可枕邯鄲夢，能無范蠡情。

鏢歌傳戰地，劍戟護鯤瀛。冉冉流光杳，朝朝任雨晴。

註:大宅曾徵調為軍方住所，砌石呈人丁字樣，冀世代綿延。

遊八八坑道

坑道香氛溢，塵心歲月磨。成名因老酒，避禍寄巖窩。

久矣邊聲遠，居然龍戰俄。吟鞭東指處，灑氣貫娑婆。

註:此處傳為先民躲避海盜之處。龔自珍《己亥雜詩》句：浩蕩離愁白日斜，吟鞭東指即天涯。

北竿島坂里沙灘

纖纖坂里沙，軌砦自橫斜。雖苦驕陽炙，猶教逸興加。

人來參玉闕，誰共話桑麻。但見風塵客，尋鷗逐浪花。

註:風火山牆為馬祖寺廟建築之特色，北竿可搭船出海到鐵尖島賞瀕臨絕種之黑嘴端鳳頭燕鷗。